

**Aningaasarsianit akileraarutit pillugit Inatsisartut inatsisaata
allanngortinneqarneranik Inatsisartut inatsisissaattut siunnersuut**

pillugu

ISUMALIUTISSIISSUT

Inatsisartut Akileraartarnermut Akitsuusiisarnermullu Ataatsimiititaliaannit

aappassaaneerinissamut saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartuni ilaasortaq Per Berthelsen (S), siulittaasoq
Inatsisartuni ilaasortaq Anders Andreassen (S), Inatsisartuni ilaasortamut Hans
Enoksenimut (S) sinniisussatut peqataasoq
Inatsisartuni ilaasortaq Lars Sørensen (IA)
Inatsisartuni ilaasortaq Daniel Skifte (A)
Inatsisartuni ilaasortaq Mads Peter Grønvald (K)

Inatsisartut Akileraartarnermut Akitsuusiisarnermullu Ataatsimiititaliaata
aningaasarsianit akileraarutit pillugit Inatsisartut inatsisaata allanngortinneqarneranik
Inatsisartut inatsisissaattut siunnersuut 2000-imi majip qulingiluaanni
ataatsimiinnermini oqaluuseraa.

Siunnersuuteqarnermi siunertarinqarpoq nunamut tamarmut akileraarutip aamma
nunamut tamarmut akileraarutip immikkut ittup procentissaannik aalajangiinissamut
killissarititap 1. november nallertinnagumiit 1. december nallertinnagumut
sivitsorneqarnissaa.

Killissarititamik sivitsuiniarneq taanna Naalakkersuisut piffissap Inatsisartut
ukiakkut ataatsimiinnerata aallartittarfiata kinguartinneqarnissaanik kissaataannut
attuumassutilittut isigineqassaaq.

Piffissaq Inatsisartut ukiakkut ataatsimiinnerata aallartittarfia kinguartinneqarpat
Inatsisartut aningaasanut inatsisissaannut siunnersuutip Inatsisartunit
peqqissaartumik suliarineqarsinnaanissaanut piffissaqarluarnissaaq

qulakkeerumallugu piffissap Inatsisartut ukiakkut ataatsimiinnerata naammassiffissaata kinguartinneqarnissaa pisariaqassaaq. Taamaammat Naalakkersuisut aningaasanut inatsisip akuersissutigineqareersimanissaanut piffissaq kinguartinneqartussanngorlugu missingersuusiortarnermut inatsisip allanngortinneqarnissaa pillugu siunnersuummik aamma saqqummiussaqrput.

Siunnersuut siullermeerneqarmat oqaaseqartuutitat arlallit kissaatigaat akileraarutissat procentissaannik aalajangiinissamut killigititaq 15. novemberimut ullulerneqassasoq.

Inatsisartut Akileraartarnermut Akiitsuusiisarnermullu Ataatsimiititaliaat aamma isumaqarpoq Kalaallit Nunaanni Inatsisartut Suleriaasiannut allannguutissatut siunnersuummi takuneqarsinnaasutut piffissaq Inatsisartut ukiakkut ataatsimiilerfissaat taamaallaat septemberimi tallimanngornerit aappaanniit pingajuannut kinguartinniarneqarmat akileraarutissat procentissaannik aalajangiinissamut killigititaq 1. decemberimut kinguartinneqarnissaa pisariaqanngitsoq.

Inatsisartut Akileraartarnermut Akitsuusiisarnermullu Ataatsimiititaliaata tamatumani ilanngullugu annertuumik pingaartippaa killigititaq 1. decemberimut kinguartinneqarnissaata kommuninit arlalinnit nangaanartoqartinneqarnera.

Inatsisartut Akileraartarnermut Akitsuusiisarnermullu Ataatsimiititaliaata tassunga atatillugu erseqqissassavaa akileraarutissat procentissaannik aalajangiinissamut killigititaq kinguartinneqarneratigut kommunit Namminersornerullutillu Oqartussat aningaasatigut missingersuusiat pilersarusiornerini ataqatigiissaarinerusalernissaat pisariaqalissasoq - pingaartumik sanaartugassanut tunngasut eqqarsaatigalugit.

Taamaammat Inatsisartut Akileraartarnermut Akitsuusiisarnermullu Ataatsimiititaliaata Naalakkersuisut kaammattorumavai taamatut ataqatigiissaarinerusalernissamut pimoorullugu peqataaqqullugit.

Inatsisartut Akileraartarnermut Akitsuusiisarnermullu Ataatsimiititaliaata naammagisimaarlugu paasivaa Naalakkersuisut siunnersuutip uuma aappassaaneerneqarnissaanut allannguutissatut siunnersuummik, akileraarutit procentissaannik aalajangiinissamut killigititaq 1. december nallertinnagumiit 15. november nallertinnagunngortillugu allanngortinneqarnissaanik imalimmik, saqqumiussilersaartut.

Akileraartarnermut Akitsuusiisarnermullu Ataatsimiititaliaap isumaqatigiittup matumuuna inassutigaa aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut Naalakkersuisut allannguutissatut siunnersuummik siuliani taaneqartumik saqqummiussereerpata iluseriligassamisut iluseqarluni Inatsisartunit akuersissutigineqassasoq.

Per Berthelsen

Anders Andreassen

Lars Sørensen

Daniel Skifte

Mads Peter Grunvold